



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

02.09.2021թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի թիվ ՍՑ-ՆԳ-2021/229

Հայաստանի Հանրապետության գնումների հետ կապված բողոքներ քննող անձը՝ ի դեմս Գրիգոր Ներսիսյանի, ուսումնասիրելով Հայաստանի Հանրապետության ֆինանսների նախարարության 23.08.2021թ. թիվ 26/26-1/13379-2021 գրությամբ Ա/Ձ Նարեկ Հենգելի Շառոյանին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, Վանաձորի համայնքապետարանի (հետայսու՝ նաև՝ Պատվիրատու) 17.08.2021թ. թիվ 01/10119 գրության հիման վրա, 23.08.2021թ. թիվ 26/26-1/13379-2021 գրությամբ նախաձեռնել է Ա/Ձ Նարեկ Հենգելի Շառոյանին (հետայսու՝ նաև՝ Մասնակից) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

2. Ա/Ձ Նարեկ Հենզելի Շառոյանի կողմից ներկայացված փաստարկները և դիրքորոշումը.

Ա/Ձ Նարեկ Հենզելի Շառոյանը, Գնումների հետ կապված բողոքներ քննող անձին ուղղված գրությամբ, հայտնել է հետևյալը.

«Հայտնում ենք Ձեզ, որ Վանաձորի համայնքապետարանի կողմից 03.08.2021թ. հայտարարված ՀՀ ԼՄՎՔ ԳՀԱՇՁԲ-21/74 ծածկագրով մրցույթի ծավալաթերթում հասկանալի տարբերակով չի ներկայացվել ծավալները աշխատանքի:

«Արժեքը իննը հատի համար» տողը լրացված էր «ամբողջը» տողից հետո: Ծավալաթերթում ներկայացրել ենք մեկ աշխատանքի արժեքը պահանջված շտկումից հետո ներկայացրել ենք իննը հատ աշխատանքի տարբերակը»:

Ա/Ձ Նարեկ Հենզելի Շառոյանը, պատշաճ ծանուցված լինելով ՍՅ-ՆԳ-2021/229 ընթացակարգի շրջանակներում 27.08.2021թ. ժամը 09:20-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

3. Վանաձորի համայնքապետարանի կողմից ներկայացված փաստարկները և դիրքորոշումը.

Վանաձորի համայնքապետարանը, ՀՀ ֆինանսների նախարարությանն ուղղված 17.08.2021թ. թիվ 01/10119 գրությամբ, հայտնել է հետևյալը.

«Հայտնում ենք, Ձեզ որ Վանաձորի համայնքապետարանի կողմից 03.08.2021թ. հայտարարված «ՀՀ ԼՄՎՔ ԳՀԱՇՁԲ-21/74» ծածկագրով մրցույթի մասնակից Ա/Ձ Նարեկ Հենզելի Շառոյանը /ՀՎՀՀ-74397977/, ներկայացել է հրավերի պահանջներին անհամապատասխան հայտ:

Ա/Ձ Նարեկ Հենզելի Շառոյանի ներկայացրած ծավալաթերթը չի համապատասխանում հրավերով սահմանված ծավալաթերթին («9 հատ տարածքի համար» սյունակը բացակայում է):

Համաձայն «ՀՀ ԼՄՎՔ ԳՀԱՇՁԲ-21/74» ծածկագրով հրավերի 8.9-ի կետի հանձնաժողովը մեկ աշխատանքային օրով կասեցրեց նիստը՝ մասնակիցներին առաջարկելով մինչև կասեցման ժամկետի ավարտը՝ 12.08.2021թ. ժամը 11:00-ն, շտկել անհամապատասխանությունները և ուղղարկել gnumnervanadzor@mail.ru էլեկտրոնային փոստի հասցեին:

Ա/Ձ Նարեկ Հենզելի Շառոյանը շտկել է ծավալաթերթը՝ կից ներկայացնելով գրություն այն մասին, որ ներկայացված գնային առաջարկում նշված է թվով մեկ տարածքի ցանկապատման համար նախատեսված գումարը:

Հիմք ընդունելով վերոգրյալը Ա/Ձ Նարեկ Հենզելի Շառոյանի կողմից ներկայացված հայտը մերժվում է»:

Պատվիրատուն, պատշաճ ծանուցված լինելով ՍՑ-ՆԳ-2021/229 ընթացակարգի շրջանակներում 27.08.2021թ. ժամը 09:20-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

4. ՍՑ-ՆԳ-2021/229 ընթացակարգի քննության համար էական նշանակություն ունեցող փաստերը.

ՍՑ-ՆԳ-2021/229 ընթացակարգի քննության համար էական նշանակություն ունեն հետևյալ փաստերը.

1. Վանաձորի համայնքապետարանի կարիքների համար Վանաձոր համայնքում աղբարկղների տարածքի ցանկապատման աշխատանքների ձեռքբերման նպատակով հայտարարվել է «ՀՀ ԼՄՎՔ ԳՀԱՇՁԲ-21/74» ծածկագրով գնանշման հարցման ընթացակարգ (հետայսու նաև՝ Ընթացակարգ), որին մասնակցելու նպատակով, ի թիվս այլ մասնակիցների, հայտ է ներկայացրել Ա/Ձ Նարեկ Հենզելի Շառոյանը:

2. Համաձայն Ընթացակարգի հրավերի պայմանագրի նախագծով սահմանված ծավալաթերթի՝ նախատեսվել է 9 հատ տարածքի համար «Վանաձոր համայնքում աղբարկղների տարածքի ցանկապատման» աշխատանքների կատարում:

3. Ընթացակարգի գնահատող հանձնաժողովի 10.08.2021թ. նիստի թիվ 2 արձանագրության համաձայն՝ Ընթացակարգի գնահատող հանձնաժողովի կողմից արձանագրվել է, որ Ա/Ձ Նարեկ Հենզելի Շառոյանի ներկայացրած ծավալաթերթը չի համապատասխանում հրավերով սահմանված ծավալաթերթին («9 հատ տարածքի համար» սյունակը բացակայում է):

4. Ընթացակարգի գնահատող հանձնաժողովը նույն արձանագրությամբ որոշում է կայացրել նիստը մեկ աշխատանքային օրով կասեցնելու վերաբերյալ՝ Մասնակցին առաջարկելով ծանուցումը ստանալուց հետո մեկ աշխատանքային օրվա ընթացքում շտկել անհամապատասխանությունները:

5. Ընթացակարգի գնահատող հանձնաժողովի քարտուղարը էլեկտրոնային եղանակով 10.08.2021թ. ծանուցել է Մասնակցին՝ արձանագրված անհամապատասխանությունները շտկելու վերաբերյալ:

6. Ընթացակարգի գնահատող հանձնաժողովի նույն արձանագրության համաձայն՝ Ընթացակարգի գնահատող հանձնաժողովը 12.08.2021թ. նիստի ընթացքում արձանագրել է, որ Ա/Ձ Նարեկ Հենզելի Շառոյանը շտկել է ծավալաթերթը՝ կից ներկայացնելով գրություն այն մասին, որ ներկայացված գնային առաջարկում նշված է թվով մեկ տարածքի ցանկապատման համար նախատեսված գումարը և որոշում կայացրել վերջինիս հայտն անբավարար գնահատելու և մերժելու վերաբերյալ:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով ՀՀ ֆինանսների նախարարության 23.08.2021թ. թիվ 26/26-1/13379-2021 գրությունը, Վանաձորի համայնքապետարանի 17.08.2021թ. թիվ 01/10119 գրությունը՝ կից փաստաթղթերով, ինչպես նաև Ա/Ձ Նարեկ Հենզելի Շառոյանի դիրքորոշումը, հայտնում եմ հետևյալը.

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պարտիրապուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Օրենքի 34-րդ հոդվածի 1-ին մասի համաձայն՝ *հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:*

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 32-րդ կետի 19-րդ ենթակետի համաձայն՝ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 40-րդ կետի 4-րդ ենթակետով սահմանվում է, որ ***հայտերի բացման և գնահատման նիստում հանձնաժողովը մերժում է այն հայտերը, որոնցում բացակայում է գնային առաջարկը, կամ եթե այն ներկայացված է հրավերի պահանջներին անհամապատասխան, բացառությամբ սույն կարգի 41-րդ կետով նախատեսված դեպքի: Գնումն էլեկտրոնային համակարգով իրականացվելու դեպքում հիմք է ընդունվում համակարգում կցված՝ մասնակցի կողմից հաստատված գնային առաջարկը.***

Կարգի 41-րդ կետով սահմանվում է, որ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի

քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Ընդ որում Կարգի 42-րդ կետի համաձայն՝ եթե սույն կարգի 41-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա նրա հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է:

Այսպես, Վանաձորի համայնքապետարանի կարիքների համար Վանաձոր համայնքում աղբարկղների տարածքի ցանկապատման աշխատանքների ձեռքբերման նպատակով հայտարարվել է «ՀՀ ԼՄՎՔ ԳՀԱՇՁԲ-21/74» ծածկագրով գնանշման հարցման ընթացակարգ, որին մասնակցելու նպատակով, ի թիվս այլ մասնակիցների, հայտ է ներկայացրել Ա/Ձ Նարեկ Հենգելի Շառոյանը:

Համաձայն Ընթացակարգի հրավերի պայմանագրի նախագծով սահմանված ծավալաթերթի՝ նախատեսվել է 9 հատ տարածքի համար «Վանաձոր համայնքում աղբարկղների տարածքի ցանկապատմում» աշխատանքների կատարում:

Ընթացակարգի գնահատող հանձնաժողովի 10.08.2021թ. նիստի թիվ 2 արձանագրության համաձայն՝ Ընթացակարգի գնահատող հանձնաժողովի կողմից արձանագրվել է, որ Ա/Ձ Նարեկ Հենգելի Շառոյանի ներկայացրած ծավալաթերթը չի համապատասխանում հրավերով սահմանված ծավալաթերթին («9 հատ տարածքի համար» սյունակը բացակայում է):

Ընթացակարգի գնահատող հանձնաժողովը նույն արձանագրությամբ որոշում է կայացրել նիստը մեկ աշխատանքային օրով կասեցնելու վերաբերյալ՝ Մասնակցին առաջարկելով ծանուցումը ստանալուց հետո մեկ աշխատանքային օրվա ընթացքում շտկել անհամապատասխանությունները:

Ընթացակարգի գնահատող հանձնաժողովի քարտուղարը էլեկտրոնային փոստի միջոցով 10.08.2021թ. ծանուցել է Մասնակցին՝ արձանագրված անհամապատասխանությունները շտկելու վերաբերյալ:

Ընթացակարգի գնահատող հանձնաժողովի նույն արձանագրության համաձայն՝ Ընթացակարգի գնահատող հանձնաժողովը 12.08.2021թ. նիստի ընթացքում արձանագրել է, որ Ա/Ձ Նարեկ Հենգելի Շառոյանը շտկել է ծավալաթերթը՝ կից ներկայացնելով գրություն այն մասին, որ ներկայացված գնային առաջարկում նշված է թվով մեկ տարածքի ցանկապատման համար նախատեսված գումարը և որոշում կայացրել վերջինիս հայտն անբավարար գնահատելու և մերժելու վերաբերյալ:

Այսպիսով՝ Մասնակիցը, Կարգի 41-րդ կետի համաձայն ծանուցվելով անհամապատասխանությունը շտկելու վերաբերյալ, սահմանված ժամկետում ներկայացրել է շտկման ենթակա փաստաթուղթը՝ միևնույն ժամանակ գրությամբ հայտնելով, որ ներկայացված գնային առաջարկում նշված է թվով մեկ տարածքի ցանկապատման համար նախատեսված գումարը, ինչն էլ հիմք է հանդիսացել Ընթացակարգի հանձնաժողովի կողմից վերջինիս հայտը մերժելու համար:

Վերոգրյալի հաշվառմամբ գտնում եմ, որ Ա/Ձ Նարեկ Հենզելի Շառոյանը «ՀՀ ԼՄՎՔ ԳՀԱՇՁԲ-21/74» ծածկագրով ընթացակարգի շրջանակներում թույլ է տվել «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված խախտում, ուստի առկա են Ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառելու հիմքերը:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության 23.08.2021թ. թիվ 26/26-1/13379-2021 գրությամբ Ա/Ձ Նարեկ Հենզելի Շառոյանին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը բավարարել և Ա/Ձ Նարեկ Հենզելի Շառոյանին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների հետ կապված բողոքներ քննող անձի որոշումն ուժի մեջ մտնելու օրվանից հաշված երկու տարի ժամկետով:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված
բողոքներ քննող անձ՝**



ԳՐԻԳՈՐ ՆԵՐՍԻՍՅԱՆ